



Na osnovu člana 2.9 stav (2) Izbornog zakona Bosne i Hercegovine ("Službeni glasnik BiH", br. 23/01, 07/02, 09/02, 20/02, 25/02, 04/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 52/22, 67/22 i 24/24) i člana 4. Odluke o raspisivanju i održavanju ponovnih prijevremenih izbora za predsjednika Republike Srpske broj: 05-1-07-1-1252-1/25 od 18.12.2025. godine, Centralna izborna komisija Bosne i Hercegovine je na 5. sjednici, održanoj 21.01.2026. godine, donijela

UPUTSTVO
o rokovima izbornih aktivnosti za održavanje ponovnih prijevremenih izbora
za predsjednika Republike Srpske

Član 1.
(Predmet Uputstva)

Uputstvom o rokovima izbornih aktivnosti za održavanje ponovnih prijevremenih izbora za predsjednika Republike Srpske (u daljem tekstu: Uputstvo), utvrđuju se rokovi izbornih aktivnosti za provođenje ponovnih prijevremenih izbora za predsjednika Republike Srpske, koji se održavaju 08.02.2026. godine (u daljem tekstu: izbori).

Član 2.
(Rokovi izbornih aktivnosti)

(1) Centralna izborna komisija Bosne i Hercegovine imenuje predsjednike i zamjenike predsjednika biračkih odbora, najkasnije u roku od 12 dana prije dana održavanja izbora, odnosno do 27.01.2026. godine.

(2) Obuka predsjednika biračkih odbora održat će se u periodu od 08 dana do 07 dana prije dana održavanja izbora, odnosno od 31.01.2026. godine do 01.02.2026. godine.

(3) Imenovanje članova biračkih odbora provest će nadležna općinska izborna komisija u skladu sa sljedećim rokovima:

- a) Izborne komisije **imenuju članove biračkih odbora** i dostavljaju akte o imenovanju članova biračkih odbora Centralnoj izbornoj komisiji BiH, najkasnije u roku od 12 dana prije dana održavanja izbora, odnosno do 27.01.2026. godine.
- b) **Obuka članova biračkih odbora** održat će se u periodu od 08 dana do 07 dana prije dana održavanja izbora, odnosno od 31.01.2026. godine do 01.02.2026. godine.

(4) **Štampa izbornog materijala** izvršit će se u periodu od 21.01.2026. godine do 28.01.2026. godine, a dostavit će se izbornim komisijama najkasnije do 05.02.2026. godine.

(5) **Zahtjevi za izdavanje akreditacija posmatračima političkih subjekata koji ne posjeduju akreditaciju** izdatu za posmatranje prijevremenih izbora za Predsjednika Republike Srpske koji su održani 23.11.2025. godine, podnose se istom OIK/ GIK koji je već izdao akreditaciju, odnosno CIK BiH za izdavanje nove akreditacije, u roku najkasnije 3 dana prije dana održavanja ponovnih izbora, odnosno do 05.02.2026. godine.

(6) **Zahtjevi za akreditiranje posmatrača udruženja koji ne posjeduju akreditaciju** izdatu za posmatranje prijevremenih izbora za Predsjednika Republike Srpske koji su održani 23.11.2025. godine, podnose se Centralnoj izbornoj komisiji BiH najkasnije 3 dana prije dana održavanja izbora, odnosno do 05.02.2026. godine.

(7) **Zahtjevi za akreditiranje međunarodnih posmatrača koji ne posjeduju akreditaciju** izdatu za posmatranje prijevremenih izbora za Predsjednika Republike Srpske koji su održani 23.11.2025. godine, podnose se Centralnoj izbornoj komisiji Bosne i Hercegovine tri (3) dana prije dana održavanje izbora odnosno do 05.02.2026. godine.

(8) **Zabrana objavljivanja rezultata** ispitivanja javnog mnijenja počinje 48 sati prije otvaranja biračkih mjesta i traje do zatvaranja biračkih mjesta, odnosno u periodu od 06.02.2026. godine u 07,00 sati do 08.02.2026. godine do zatvaranja biračkih mjesta.

(9) **Izborna šutnja** počinje 24 sata prije otvaranja biračkih mjesta i traje do zatvaranja biračkih mjesta, odnosno u periodu od 07.02.2026. godine u 07,00 sati do 08.02.2026. godine, do zatvaranja biračkih mjesta.

(10) **Unos i obrada rezultata izbora elektronskim putem** vrši se od 08.02.2026. godine u sljedećim rokovima:

- a) prikupljanje obrazaca sa biračkih mjesta od 20,15 do 20,45 sati
- b) unos rezultata od 20,45 do 21,00 sat

(11) **Birački odbori vrše dostavu rezultata glasanja i kompletan izborni materijal** do nadležnih izbornih komisija, najkasnije u roku od 12 sati po zatvaranju biračkih mjesta, odnosno do 09.02.2026. godine do 7,00 sati.

(12) **Centralna izborna komisija BiH od izbornih komisija preuzima izborni materijal i originalne obrasce** od 12 do 24 sata po zatvaranju biračkih mjesta, odnosno 09.02.2026. od 07,00 sati do 19,00 sati.

(13) **Podnošenje prigovora na rad biračkog odbora** vrši se u roku od 72 sata od učinjene povrede.

(14) **Centralna izborna komisija Bosne i Hercegovine utvrdit će rezultate ponovljenih prijevremenih izbora za predsjednika Republike Srpske na 136 biračkih mjesta u 17 osnovnih izbornih jedinica najkasnije 7 (sedam) dana od dana održavanja ponovljenih prijevremenih izbora za predsjednika Republike Srpske.**

(15) Nakon isteka roka i pravosnažnosti odluka po žalbama, Centralna izborna komisija Bosne i Hercegovine potvrdit će rezultate prijevremenih izbora za predsjednika Republike Srpske i objaviti ih u službenim glasilima.

Član 3.
(Stupanje na snagu i objava u službenim glasilima)

Ovo Uputstvo stupa na snagu danom donošenja i objavit će se u “Službenom glasniku BiH”, “Službenim novinama Federacije BiH”, “Službenom glasniku Republike Srpske”, “Službenom glasniku Brčko Distrikta BiH” i na internetskoj stranici Centralne izborne komisije Bosne i Hercegovine, www.izbori.ba.

Broj: 06-1-07-1-832-5/25

Datum: 21.01.2026. godine



Predsjednik

Joan Kalaba